

Date : 05 Oktober 2018
Title : Perlu berani lapor isu sensitif
Publication : Kosmo!
Page : 12

12 NEGARA

KOSMO! JUMAAT 5 OKTOBER 2018

Media arus perdana ditegur tidak banyak dedahkan isu-isu pembongkaran

Perlu berani lapor isu sensitif

Oleh MANIRAH OTHMAN

BANGI – Penasihat Khas Media dan Komunikasi kepada Perdana Menteri, Datuk A. Kadir Jasin (gambar kecil) menegur tindakan media arus perdana yang tidak banyak membuat pendedahan serta melaporkan isu-isu sensitif termasuk aktiviti melombong pasir laut yang semakin berleluasa.

Jelasnya, media perlu memainkan peranan aktif untuk membongkar isu tersebut kerana ia bukan sahaja mencabul kedaulatan tetapi turut melibatkan isu strategik serta keselamatan negara selain menjejaskan hidrologi dan topografi.

"Sekarang kita tidak lagi melombong di daratan. Kita melombong minyak, gas di laut. Itu biasa, semua orang buat.

"Tapi sekarang ini ada yang melombong pasir (laut) untuk dieksport sebagai industri berbilion ringgit di Malaysia," katanya.

Beliau berkata demikian ketika menyampaikan ucapan sempena Forum Media Kebangsaan 2018 bertemakan 'Merealisasikan Kebebasan Media Era Pakatan Harapan' di Universiti Tenaga Nasional di sini semalam.

Forum berkenaan anjuran Institut Akhbar Malaysia (MPI). Antara ahli panel jemputan forum tersebut ialah Penolong Ketua Pengarang 1 Kumpulan Utusan, Datuk Mohd. Zaini Hassan; Penasihat Eksekutif Editorial Kumpulan Karangkraf, Datuk Abdul Jalil Ali; Ketua Pegawai Eksekutif Malaysiakini, Premesh Chandran dan Pesuruhjaya Suruhanjaya Hak Asasi Manusia, Prof. Madya



A. KADIR (enam dari kiri) bergambar bersama sebahagian daripada ahli-ahli panel jemputan pada Forum Media Kebangsaan 2018 di Bangi semalam. Berdiri dua dari kiri ialah Chamil Wariya.



MEDIA perlu berani membongkar isu sensitif termasuk aktiviti melombong pasir laut yang semakin berleluasa. - Gambar hiasan

Nik Salida Suhaila Nik Saleh.

Selain media, turut terlibat ialah ahli akademik di Pusat Penyelidikan Dasar dan Kajian Antarabangsa Universiti Sains Malaysia, Prof. Datuk Dr. Ahmad Muzed Marican; Pengarang Urusan *Malay Mail*, Leslie Lau; Ketua Pegawai Eksekutif MPI, Datuk Dr. Chamil Wariya serta dua ahli Persatuan Pendidik Komunikasi Malaysia, Prof. Madya Datuk Dr. Ismail Sualman, dan Dr. Syed Agil Al-Sagoff.

Mengulas lanjut mengenai aktiviti melombong pasir, menurut A. Kadir, pihak terbabit bertindak mengurangkan alih tanah di kawasan tepi pantai dan laut supaya mereka boleh melakukan

aktiviti melombong di luar kawasan pantai dengan lebih mudah.

Jelasnya, kegiatan tersebut semakin menjadi-jadi kerana permintaan tinggi untuk tujuan eksport.

Sementara itu dalam perkembangan lain, A. Kadir menjelaskan, kerajaan menyokong pembentukan Majlis Media Malaysia selain bersedia memberikan peruntukan kuasa undang-undang kepada badan tersebut bagi memastikan pengurusan media di negara ini tidak dipengaruhi pihak tertentu.

"Memang kerajaan mahukan ia dibentuk secepat mungkin. Terpulang kepada anda (komuniti media) kerana kita tidak mahu wujud persepsi bahawa kerajaan terbabit dalam memberikan sebarang 'wahyu'," katanya.

Gegaran, letupan di Ipoh bukan berpunca daripada gempa bumi

IPOH – Kejadian letupan dan gegaran kuat yang berlaku di beberapa kawasan di bandar raya ini pagi semalam bukan berpunca daripada kejadian gempa bumi.

Ketua Pengarah Jabatan Meteorologi Malaysia, Ali Bahari berkata, tiada sebarang isyarat atau amaran gempa diterima melalui alat pengesan gempa bumi.

Jabatan itu menafikan sebarang kejadian gempa bumi yang berlaku di negeri Perak dan gegaran itu tidak mempunyai kaitan dengan gempa bumi di Indonesia.

"Letupan itu bukan satu kejadian gempa bumi atau fenomena alam. Selain itu, kita juga tidak menerima sebarang isyarat gempa bumi.

"Pejabat Jabatan Meteorologi Perak di Sitiawan juga mendapat pelbagai panggilan daripada orang awam yang bertanyakan mengenai kejadian itu, namun ia bukan gempa bumi," katanya ketika dihubungi *Kosmo!* di sini semalam.

Terdahulu, satu letupan dan gegaran berlaku di sekitar bandar raya ini kira-kira pukul 11 pagi semalam.

Kejadian tersebut juga tular di laman sosial seperti Facebook dan Twitter apabila ramai penduduk di sekitar Ipoh merasa dan mendengar letupan itu.

Sementara itu, Ketua Polis Daerah Ipoh, Asisten Komisioner Mohd. Ali Tumby berkata, tiada sebarang laporan mengenai kejadian tersebut di 25 buah balai polis di Ipoh.

Bagaimanapun, pihak polis masih berusaha untuk mendapatkan maklumat lain atau pengesahan daripada pihak berkaitan.

Dalam pada itu, Komandan Akademi Tentera Udara Diraja Malaysia, Kolonel Abdul Nazar Abdul Hamid menafikan letupan dan gegaran tersebut berpunca daripada aktiviti latihan pasukan itu seperti yang tular di media sosial.